



LE GOUVERNEMENT
DU GRAND-DUCHÉ DE LUXEMBOURG
Ministère de l'Environnement, du Climat
et du Développement durable

Äntwert vun der Ministesch fir Ëmwelt, Klima an nohalteg Entwécklung op d'parlamentaresch Fro n°7558 vum 7. Februar 2023 vum éierewäerten Deputéierten Här Marc Goergen iwwert den "Projet hôtelier à Rodange"

Bei deem Dokument vum 3. Juli 2022 handelt et sech ëm een Accord op Basis vum Artikel 33 vum Naturschutzgesetz. An deem Kontext gouf iwwerpréift, ob de geplangte Projet net der Integritéit vun der concernéierter Natura2000 Zone schuede géing. An deem Dokument goufen och Konditiounen festgehalen, déi erfëllt musse ginn.

- 1. Nom Naturschutzgesetz souwéi der europäescher FFH-Direktiv mussen Déieren, déi bedroht sinn, speziell geschützt ginn. An den Etüden vun 2009, 2010 an 2020, op déi sech d'Autorisatioun baséiert, ass kee Wuert iwwert déi Déierenaarten ze fannen, déi an der Annexe 4 vun der Direktiv stinn. Wat ass de Grond hefir?**

An der Etüd vun 2010 sinn d'Flantermas vum der Annexe 4 vun der FFH-Direktiv betruecht ginn. Opgrond vun der Konfiguratioun an der Notzung vum Terrain ass eng Präsenz vun aneren Aarten vun der Annexe IV net relevant fir des Etüd gewiescht. Esou Etüde ginn ëmmer cibléiert op bestëmmten Aartegruppe gemaach opgrond vun der Qualitéit vum Terrain als Liewensraum an de Liewensraumufuerderunge vun den respektiven Aarten.

- 2. Ass d'Ministesch der Meenung, dass d'Methodik vun den Etüde vun 2009, 2010 an 2020 d'Krittäre vum "Leitfaden zur Berechnungsmethodik" vum Ökopunkte-System vum 19. Abrëll 2019 erfëllt? Gouf de Punkt 2.3. "Faunistische Erhebung" bei den Etüden vun 2009 an 2010 no de Krittäre vun 2019 duerchgefouert?**

Den Ökopunkte-System muss nom Artikel 17 vum modifizéierten Naturschutzgesetz vum 18. Juli 2018 ugewannt ginn bei engem Terrain an enger klasséierter Bauzon wann et zu enger Zerstéierung vu geschützte Biotopen oder Habitats d'espèces kennt. Den Ministère fir Ëmwelt, Klima an nohalteg Entwécklung (MECDD) huet aus den Donnéeën déi virounge keen esou een Ausléiser festgestallt.

- 3. Kann d'Ministesch garantéieren, dass d'Opstelle vun enger eenheemescher Heck duergeet, fir déi gefährdet Fliedermauspopulatiounen ze schützen? Kann d'Ministesch ausschléissen, dass soumadder de Bau vum Hotel een Impakt op d'Ëmwelt an d'Déieren wäert hunn?**

D'Etüde vun 2010 an 2020 confirméieren, dass d'Opstelle vun enger Heck no de Krittäre wéi se an der Etüd vun 2020 an och am Accord vum 3. Juli 2022 festgehal goufen, d'Funktionalitéit vun där Leitlinn fir d'Flantermas sécheren. No éischten Echangingen mat menge Servicere gouf déi ursprüngelech geplangten Lag vum Gebai iwweregens ugepasst, fir eng méi grouss Distanz zou där Leitlinn ze hunn an hir Funktionalitéit ze erhalen.

- 4. Ass d'Ministesch der Meenung, dass déi zweet Kompensatiounsmoossnam, d'Ëffnung vun engem weidere Stollen, d'Fliedermais wäert zousätzlech schützen, wann ee weess, dass schonn 3 Stollen op sinn an d'Stollen ënnertene souwisou scho verbonne waren? Oder ass des Moossnam éischter als eng kleng, marginal Kompensatioun ze gesinn?**



Dat ass eng vun de Moosnamen déi den Expert uginnt huet an déi och ëmgesat gouf. Et ass keng marginal Kompensatioun, ma eng wichteg Moosnam fir all d'Flantermais am FFH-Gebitt.

- 5. Wéi gouf der grousser Hufeisennues bei dëser Autorisatioun Rechnung gedroen, wëssend, dass dës Fliedermaus déif flitt (d'Hufeisennues flitt an dësem Fall net méi héich, wéi d'Héisch vum Hotel)?**

De Besoinen an dem Schutz vun der grousser Hufeisennues gouf an den Etüden an am Accord Rechnung gedroen, notament mat de schonns genannten Moosname vun der Planzung vun enger Heck déi besonnesche Krittäre musse Rechnung droen, der Upassung vun der Lokalisatioun vum Gebai an dem Opmaache vun engem Stollen am FFH-Gebidd.

- 6. Eng Schutzzon muss kënnen ootmen a brauch eng Pufferzon. Aktuell funktionéiert den Terrain, wou den Hotel soll drop kommen, als Pufferzon, eng sougenannten ECOTON-Zon, tëschent dem Bësch an dem "milieu ouvert". Mam neien Hotel gëtt déi Pufferzon elo méi kleng. Wäert dës Pufferzon nom Bau vum Hotel nach eng ECOTON-Zone bleiwen?**

Ech verweisen op d'Äntwert op d'Fro n°3. D'Funktionalitéit vun der Leitlinn laanscht de Bësch bleift bestoen an de Bëschrant selwer ass vum Projet net betraff.

- 7. Ass d'Ministesch der Meenung, dass d'Etüden, op deenen d'Autorisatioun getraff gouf, no den heitege wëssenschaftlechen Erkenntnisser nach aktuell ass?**

D'Loftbiller um Geoportail weisen ganz däitlech, dass d'Konfiguratioun an d'Notzung vum Terrain säit der Etüd vun 2010 stabil ass, dass also seng ökologesche Wäertegkeet sech net verännert huet. D'Resultater vun der Etüd sinn deemno als robust unzegesinn an dowéinst och als Basis fir den Accord genotzt ginn.

- 8. Gouf bei der Autorisatioun just den Impakt vum Hotel gekuckt oder och dee vun der Bebauung vum beileienden Terrain, wou spéider ee Wellness-Resort soll drop stoe kommen, deen am Konzept vum Hotel opgefouert gouf?**

Den Accord bezitt sech just op de Bau vum Hotel-Projet.

- 9. Gëf d'Autorisatioun, déi am Juli 2022 accordéiert gouf, no de Krittäre vum neien "Plan National concernant la Protection de la Nature (PNPN3)" nach eng Kéier esou aus ausgestallt ginn?**

De PNPN3 setzt kee legalen Kader fir d'Aussstelle vun Autorisatiounen am Naturschutzberäich. Dat ass alleng d'Naturschutzgesetz.

- 10. D'Liichtverschmutzung ass a kenger vun de viregen Etüden een Thema, gëtt awer als eng Prioritéit am PNPN3 opgefouert. Firwat goufen an der Autorisatioun keng Moosname géint d'Liichtverschmutzung getraff, wéi zum Beispill, dass op déieren- an insektefrëndlech Luuchten (Amberlights) gesat gëtt oder d'Belichtung op verschiddene Säite vum Hotel reduzéiert muss ginn?**



LE GOUVERNEMENT
DU GRAND-DUCHÉ DE LUXEMBOURG
Ministère de l'Environnement, du Climat
et du Développement durable

D'Auswierkunge vun der Beliichtung sinn an der Etüd vun 2020 betruecht ginn. D'Uleeën vun enger Heck no bestëmmte Krittären ass vum Expert als gëeegent Moosnam definéiert an och am Accord vum 3. Juli 2022 iwwerholl ginn.

Lëtzebuerg, den 6. Mäerz 2023
(s.) Joëlle Welfring
Ministesch fir Ëmwelt, Klima an nohalteg Entwécklung